

Aalisarnermi saniatigut pisat pillugit Namminersornerullutik Oqartussat nalunaarutaat

Aalisarnek pillugu Inatsisartut inatsisaanni nr. 18-imi 31. oktober 1996-imeersumi kingullermillu Inatsisartut inatsisaatigut nr. 5 12. november 2008-kut allanngortinneqartukkut § 23, imm. 1, § 33, imm. 2 aamma 3 aamma § 34, imm. 3 malillugit aalajangersarneqarpoq:

§ 1. Nalunaarut atuuppoq imartani Kalaallit Nunaata aalisarnermut oqartussaaffeqarfini aalisakkanik ukuninnga aalisarnermut:

- 1) Saarulliit (*Cadus morhua*)
- 2) Raajat (*Pandalus borealis*)
- 3) Qalerallit (*Reinhardtius hippoglossoides*)
- 4) Nataarnat (*Hippoglossus hippoglossus*)
- 5) Qeeqqat nimeruaartut (*Anarchichas lupus*)
- 6) Qeeqqat milallit (*Anarchichas minor*)
- 7) Imminnguit (*Coryphaenoides rupestris*)
- 8) Tupissutit (*Marrourus berglax*)
- 9) Ammassaat (*Mallotus villosus*)
- 10) Saattussat (*Chionoecetes opilio*)
- 11) Saarulliusaat (*Cadus poutassou*)
- 12) Eqalukkat (*Boreogadus saida*)

Imm. 2. Nalunaarutaaq atuuppoq imartani Kalaallit Nunaata aalisarnermut oqartussaaffeqarfini suluppaagarniarnermut (*Sebastes marinus* aamma *Sebastes mentella*) qalorsuarnik natersiutininik imaluunniit qalorsuarnik ikerinnarsiutininik aalisarneqarnerat apeqqutaatinnagu.

§ 2. Saniatigut pisat tassaapput aalisakkanik § 1-imi taaneqartunik pisat, taakku angallatip aalisarnissamut akuersissutaanut (licens) ilaangikkaangata, imaluunniit § 3 malillugu mikinerpaaffissatut uuttuutininik naammassinissimangippata.

Imm. 2. Imm. 1 malillugu saniatigut pisanutaaq naatsorsuunneqassapput pitsaassuseq pissutigalugu eqqarneqartut, tassa imaappoq pisat tunisassiornermi ajoquserneqartut taamaammallu tunineqarsinnaangitsutut iginneqartut. Pitsaassutsimik pissuteqartumik igitat koorinut katersorneqassapput allatulluunniit oqimaalutarneqassallutillu aamma umiarsuup allattaaviinut allanneqassallutik eqqaasoqalersinnagu.

Imm. 3. Saniatigut pisat aalisarnermut atortup atorineqartup kingullermik imaareerneratigut angallatip qaavani aalisakkat tamarmik oqimaassusiisa imaluunniit aalisakkat tamarmik angallammiittut imaluunniit tulaanneqartut procentiattut uuttortarneqassapput. Saniatigut pisat aalajangiivigineqassapput angallatip

qaavani aalisakkanut tamanut naleqqiullugu uuttortaasoqaraangat, pisat nalaatsornikkut immikkoortinneqartut ikinnerpaamik 300 kg misiligutissat tunngavigalugit. Angallammi aalisakkanut tamanut imaluunniit tulaassanut naleqqiullugu uuttuinikkut annertussutsit tamarmiusut naatsorsorneqassapput umiarsuup allattaavii malillugit angallatip pitsaassutsimik pissuteqartumik eqqagai ilassutigalugit.

Imm. 4. Nakkutilliisutut oqartussaasut qanoq iliorluni uuttortaasoqarnissaa aalajangissavaat.

Imm. 5. Saniatigut pisat angallatip pisassaanit, taamaattunik peqartoqassappat, ilanngaatitut nalunaarsorneqassapput; imaluunniit naalagaaffiup pisassaanit, taamaattunik peqartoqassappat; imaluunniit Kalaallit Nunaata pisassaanit. Tamakkununnga ilaangillat imaanut avalatsitseqqinnerit § 4-mi taaneqartut.

Imm. 6. Aalisarnermi aalisakkanik arlalinnik iluanaarniutigissallugit soqutiginaateqartunik, § 1-imi imm. 1 takuuk, ataatsikkut pisaqartoqarnissaa pinngitsoorneqarsinnaatinnagu angallat aalisariut, aalisakkat assigiinngitsut ataasiakkaat pisarineqarsinnaassusiat eqqarsaatigalugu akuerineqarsinnaassappat, aalisakkanik assigiinngitsunik tamanik pisassinneqassaaq.

§ 3. Mikinerpaaffissatut uuttuut (sigguata nuuniit paperuata nuuanut uuttortarneqartoq) saarullinnut 40 cm-iuvoq, qaleralinnut 42 cm-iulluni aamma nataarnanut 60 cm-iulluni.

Imm. 2. Saattussanut angutivissanut mikinerpaaffissatut uuttuut 9 cm-iuvoq tunuani qaleruaatigut uuttortarlugu.

§ 4. Nataarnat saniatigut pisarineqartut, qalorsuaanngitsunik atortoqarluni pisarineqartut, angallammi uninngatinneqassanngillat, kisiannili imaanut avalatseqqinneqassallutik, sapinngisamik ajornanngippat uumatillugit.

Imm. 2. Saattussat angutivissat, mikinerpaaffissatut uuttuummit mikinerusut, kiisalu saattussat arnavissat angallammi uninngatinneqassanngillat, kisiannili imaanut avalatseqqinneqassallutik, ajornanngippat sapinngisamik uumatillugit.

Imm. 3. Bundgarnersorluni aalisarnermi aalisakkat mikinikut § 3 takuuk angallammi uninngatinneqassanngillat, kisiannili imaanut avalatseqqinneqassallutik, ajornanngippat sapinngisamik uumatillugit. Akuerineqarsinnaavorli saarulleeqqat nammineq atugassat mikinerpaaffissatut uuttuummik naammassinnissimangitsut pisarineqarnissaat.

§ 5. § 2-mi imm. 1-imi, naggammi kingullermi aamma § 4-mi taaneqartut allassimasut pinnagit § 1-imi imm. 1-imi aalisakkanik taaneqartunik pisat suulluunniit angallammi uninngatinneqassapput nunamullu tulaanneqassallutik.

§ 6. Bundgarniunngitsunik aamma saattussanut pullataanngitsunik atortoqarluni aalisarnermi aalisarnek unitsinneqassaaq aalisarfillu qimanneqassalluni ataasiarluni amuarnermi saniatigut pisat kalinnermi tamakkerlugit pisat oqimaassusiisa 10 %-ii sinnerpatigit. Aalisarnek aallarteqqinneqassanngilaq umiarsuup allattaaviini allassimasutut kalilerfiup kalikkunnaarfiullu akornanni titarnermiit 5 sømilinit qaninnerusumi.

Imm. 2. Taamaattorli kilisaatip, imm. 1-imi taaneqartutut pissutsinik nalaassisup, aalisarfimmi tassani aalisarnini nangeqqissinnaavaa qalorsuarni ristinik panelinilluunniit saniatigut pisat annertussusiinik annikillitsisussatut naatsorsuutigineqartunik ikkussisoqareerneratigut - imaluunniit qalorsuit qalorsuarnik allanik taamaattunik panelertalinnik ristertalinnilluunniit taarserneqareernerisigut. Tamatuma kingornatigut saniatigut pisat ataasiarluni kalinnermi oqimaassutsimikkut kalinnermi pisat tamarmiusut 10 %-ii sinnerpatigit imm. 1 malillugu aalisarnek allamut nuunneqassaaq.

Imm. 3. Imm. 1-imi aalajangersagaq apeqquaatinnagu ataasiarluni aalisariarnermi (umiarsuup allattaaviinut allattuilluni angalanermi) nataarnat pisat akunnaallisillugu saniatigut pisatut 5 tonsit sinnersimassanngilaat.

Imm. 4. Imm. 1-imi aamma 2-mi aalajangersakkat apeqquaatinnagit angallatini angallammi nammineq tunisassiornissamut akuersissuteqarfigineqarsimasuni saniatigut pisanik uninngatitat ullut unnuallu aalisarfusut qulit kingornatigut angallatip pisaasa tamarmiusut oqimaassusiisa 10 %-ii sinnersimassanngilaat. Angallatinut angallammi nammineq tunisassiornissamut akuersissuteqarfigineqarsimanngitsunut tamanna atuuppoq ullut aalisarfusut sisamat kingornatigut.

Imm. 5. Aalisakkanik aalajangersimasunik naalagaaffiup pisassai pisassa qarfusumi aalajangersimasumi tamakkerlugit aalisarneqarpata, aalisakkat pineqartut saniatigut pisassatut pisassa qarfusumi tassani allatut aalisarnikkut aalisarneqassanngillat. Taamaaliortoqassanngilarli nunat tamalaat isumaqatigiissutaat pisussaaffilu malillugit umiarsuaatillit akuersissuteqarfigineqarsimaneranni tamanna allassimatillugu.

§ 7. Aalisarnermut, Piniarnermut Nunalerinermullu Naalakkersuiso qarfiup imartaq aalajangersimasunik aalisarnermut atortoqarluni aalisarfiusoq matusinnaavaa, tassani annertuallaanik saniatigut pisaqartoqartoq paasineqarpat. Tamakku pillugit nalunaaruteqartoqassaaq tusagassiuutitigut tamanut saqqummiussinikkut, imartami pineqartumi umiarsuarnut telefaxernikkut imaluunniit telegrammernikkut aamma kalaallit angallataannut tunngatillugu angallatit pineqartut piginnittaannut telefaxernikkut. Angallatinut nunani EU-mut ilaasortaasuni nalunaarsorneqarsimasunut tunngatillugu nalunaarut EU-kommissionimut nassiuuneqassaaq aammalu kalaallit angallatiginngisaannut allanut tunngatillugu naalagaaffiup aalisarnermut oqartussaasuinut.

Imm. 2. Imartaq matoqqatitaq ammaqqinneqassaaq tassani nakkutigineqartumik aalisarnikkut paasinarsippat imartami tassani saniatigut pisat pillugit maleruagassat unioqqutinnagit aalisartoqarsinnaasoq.

§ 8. Naalakkersuisut misileraalluni aalisarnissamut akuersissuteqarnikkut imaluunniit pissutsit immikkut illuinnartut tamanna pisariaqartissappassuk nalunaarummi uani mikinerpaaffissanut uuttuutinik maleruagassat aamma saniatigut pisat killilersorneqarnerisa immikkut saneeqqunneqarnissaannik akuersissuteqarsinnaapput.

Imm. 2. Naalakkersuisut kilisaatit kinguppanniutit aalisakkanik § 5 malillugu igitseqqusaannginnermik piumasaqaammit atuutsitsinngikkallarnissamik immikkut akuersissuteqarsinnaapput, umiarsuarmi kinguppanniuummi aalisakkanik nioqqutissiornissamut piumasaqaatit naammassisserlugit. Taamatut immikkut akuersissuteqarsimaneq ukiumut ataatsimut atuuttassaaq, umiarsuaatileqatigiillu ukiumut pisassiissutaannut nalunaarummi allanneqartassalluni.

Pineqaatissiinerit

§ 9. Nalunaarummi matumani aalajangersakkanik unioqqutitsinerit akiliisitsinermik kinguneqarsinnaapput. Angallammit unioqqutitsilluni aalisartoqartillugu aalisarnermut atortut atorneqartut, angallatip pisai tamaasa taakkaluunniit nalingi arsaarinnissutigineqarsinnaapput, pisat unioqqutitsinani aalisarnermit pissarsiarineqartutut uppersararneqartut pinnagit. Taamatuttaaq tamakku pillugit suliat aalisarneq pillugu Inatsisartut inatsisaanni maleruagassat malillugit suliarineqartassapput.

§ 10. Nalunaarut atuutilerpoq ulloq 1. januar 2009.

Imm. 2. Tamatumunnga peqatigitillugu aalisarnermi saniatigut pisat pillugit Namminersornerullutik Oqartussat nalunaarutaat nr. 32 14. december 1995-imeersoq atorunnaarsinneqarpoq.

Namminersornerullutik Oqartussat, ulloq 11. december 2008

Finn Karlsen

/

Amalie Jessen

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut